

**Qanoq iliornikkut qitiusumiit eqiterussinerup millisarnera inunnut ataasiakkaanut  
inuaqatigiinnullu iluaqutaasinnaanera pillugu apeqquteqaat aallaavigalugu  
oqallisissiaq.**

(Inatsisartunut ilaasortaq, Aqqalu C. Jerimiassen, Atassut)

### **Akissuteqaat**

(Aningaasaqarnermut Nunamullu Namminermut Tunngassutilinnut Naalakkersuisoq)

## **1. Siullermeerneqarnera**

Apeqquteqaateqartup Inatsisartut inuaqatigiinni suliassarpassuarnut tunngatillugu qitiusumik, siammarsimasumik namminersortunillu aaqqiissuteqartoqarnissaanut tunngasumik oqallisiginninnissaannut pissutissaqalersitsineranut qujanaq.

Siunnersuuteqartup namminersortut akornanni, namminersorumatuut akornanni pisortallu suliffeqarfutaanni naligissaarinissamik pissutissaqartumik siunnersuutini tunngavilersorpaa. Nunatsinni nunanut allanut sanilliullugit pisortat suliffeqarfutaat – namminersorlutik oqartussat, kommunit suliffeqarfait pisortanit pigineqartut ataatsimoortillugit – namminersortunit amerlanerungaatsiarput. Nunatsinni pisortat pigisaanni sulisut sulisinnaasut 44 %-eraat – Norgemi tamanna 33 %-imiippoq, Frankrigimi 31 %-imi Tuluit Nunaannilu 29 %-iinnarmiilluni.

Siuariortornissaq angussagaanni tunngaviusumik piumasaqaataavoq, namminersortut pisortat ingerlatsiviinit ukiuni tulleriinni ineriartornerussasut. Suliap ingerlanerani tamatta allaanerusumik eqqarsartariaqarpugut. Tunngavigisanik aqtsinermut sakkut Naalakkersuisut Missingersuutinut Naatsorsuutinullu inatsimmut naleqqussaanissamut siunnersuutaanni, ataatsimiinnermi matumani oqaluuserineqartussami ilaasut tamatumunnga aamma sammippuit. Taamatullu ineriartorneq taanna Attassinissamik Siuariortornissamullu pilersaarummi nutaami taperserneqarnissaa naatsorsuutigineqarpoq.

Namminersorlutik Oqartussat kommunillu akornanni suliassat agguataarneri immikkut isiginiarneqarput. Suliassaq pitsaanagerpaamik akikinnerpaamillu aaqqiissuteqarfingineqarsinnaaffimmini aaqqiivigineqassaaq. Ukiuni kingullerni assigiinngitsunik nuussisoqarpoq, pingaartumik sanaartornissamik aalajangiinissat qitiusumik eqimattanit kommuninut nuunneqarput. Ineriartorneq tamanna Naalakkersuisunit suli tapersorsorneqarpoq.

Kommuninik minnerusunik maannakkut aaqqissuussinermut, kommunerujussuarnut eqiterineq inuaqatigiit ilaannit qaninnermik annaasaqaataasutut suli misigineqartarpoq. Eqqaamaneqartariaqarporli aamma kommunerujussuanngortitsineq innuttaasut inatsisitigut isumannaatsuunerat pitsangoriarniarlugu piumasarineqarpoq, tamannalu qitiusumik piginnaasalimmit allaffisorneq kommunit minnernit pitsaanerussaaq. Naalakkersuisut

inuiaqatigiit inatsisitigut isumannaatsuunissaasa ukkatarineqarnissaat suli pisariaqartinneqarsoraat, tamanna Ombudsmandip ukiumoortumik nalunaarutigisartagaani aamma oqariartuutigineqartarpooq.

Siunissami aningaasaliissutissat siaruarnissaat naalakkersuisooqatigiinnermut isumaqatigiissummi aamma ilisimaqquneqarpoq. Sanaartornermut inuussutissarsiortunullu aningaasaliissutit kommuninut nuunneqarnissaat nunalu tamakkerlugu kommuninilu suleqatigiinnerup annertusarneqarnissaanik kissaateqarneq aamma taaneqarpoq. Kalaallit Nunaanni inuussutissarsiornermik siuarsaanermi takornariartitsinermilu suliniutit qanoq annertunerusumik nunap immikkoortuinit aallaaveqarnerutinneqarsinnaanerat Inuussutissarsiornermut Niuernergullu Naalakkersuisup misissuiffigileruttorpaa.

Naalakkersuisut taama oqaaseqarlutik qitiusumit siammarterineq, inatsisitigut isumannaatsuuneq aamma pisortat namminersortullu ingerlataasa akornanni naligiissaarineq pillugit oqallinnissaq qilanaaraat.